

禮記章句

禮記章句卷二

船山遺書十三

衡陽王夫之譏

曲禮下

凡十三章

凡奉者當心提者當帶

奉芳勇反

凡者平交授受之禮器無繫者奉有繫者提帶大帶在脇下無骨閒所奉者當心所提者當帶肘腕恆平在心帶之閒也

執天子之器則上衡國君則平衡大夫則綏之士則提之

上時掌反
綏湯果反

衡謂肩衡考工記曰鄉衡而實不盡上衡手齊肩平衡器齊肩綏手齊肩提如提者手在心帶之間也爲大夫執器者其家臣士則其賓友益助饋奠而執俎豆之屬凡執主器執輕如不克

主器助祭於君而奉瓚爵之屬易曰主器者莫若長子克勝也

執主器操幣圭璧則尙左手行不舉足車輪曳踵立則磬折垂佩

操幣圭璧者助奠瘞及聘禮所有事也尙左手者兩手拱抱之左加右上也車輪曳踵謂趾微舉而踵常附地

曳之以行如車輪之蹠地無絕迹敬慎之至則不必有
傾仆之憂而恆操恐慮也立謂稍立俟用閒磬折俯而
脊折如磬之句倨然磬折而佩垂矣

主佩倚則臣佩垂主佩垂則臣佩委

此執器玉而與主相授受之容倚附於身垂離身而懸
於空委拂地也主植立而佩倚裳則臣小俛而佩垂主
致敬而俛則臣大俛而佩委於地授受必下於君也

執玉其有藉者則裼無藉者則襲

執玉執聘圭及琮璋也玉必有繅藉以韋衣木版承玉
而加絢組之繫紆組兩端令垂向下謂之有藉屈組在

手謂之無藉其衣服之制夏葛冬裘上有裼衣裼衣上有襲衣襲衣上加正服掩而不開謂之襲若開此正服及襲衣左袒露其裼衣則謂之裼裼見美也襲充美也有藉則玉見其美無藉則玉藏其美故衣服各從其文質之稱所以尊玉也聘則屈纁享則垂纁

右第一章 此章所記操奉授受之容與上篇第三十八九章相類特上篇所記乃少賤之事而此所記者爲宗廟朝廷之禮故不以類相屬而繫於此凡二篇之序繇弟子之儀以及成人之節繇家庭鄉黨以及於邦國漸推而及於大者是爲曲禮之次第云

妾

相怠亮反
長丁丈反

國君不名卿老世婦大夫不名世臣姪娣士不名家相長
卿老上卿也天子有二十七世婦以降殺差之諸侯當
有九世婦也世臣謂父之臣姪娣大夫一娶三女姪娣
二媵也家相子弟任家政者長妾妻之有子者不名者
別尊卑養廉隅也

君大夫之子不敢自稱曰余小子大夫士之子不敢自稱
曰嗣子某

自稱謂攝祭時君諸侯大夫天子大夫視諸侯者大夫
士諸侯之臣也余小子王世子之稱嗣子某侯國世子

之稱

不敢與世子同名

天子之世子天下避之諸侯之世子一國避之

右第二章

君使士射不能則辭以疾言曰某有負薪之憂

使士射謂以備耦也不能者卑賤不敢與君耦託以不能也辭以疾所謂託於不能負薪賤者之辭

侍於君子不顧望而對非禮也

顧望謂顧望同列讓人對也若呼其名而問之則否也

右第三章

君子行禮不求變俗祭祀之禮居喪之服哭泣之位皆如其國之故謹修其法而審行之

此爲大夫士之去國者言也求者歆羨之辭俗舊習謂不散於新國而改故俗以從之也周之侯國各以事守用其先代之禮如祭祀則有求陰求陽之類居喪則有旁親降不降之類哭泣則有賓主男女東西之別各仍其俗而爲法焉謹修慎於講習審行臨事不惑也君子敦仁不忘其本不以君臣義絕而輕改之誠有其不忍者也

去國三世爵祿有列於朝出入有詔於國若兄弟宗族猶

存則反告於宗後

爵祿有列者謂君爲其家立後使守先祀也詔告也出入有詔謂所遷不定或更徙他國猶告之故君令知所往也兄弟謂始出奔者兄弟之後宗族宗子收其族人也反告者告報吉凶之事而行宗後者宗子及君所命爲後者也如此則一如其故國之禮而行之矣

去國三世爵祿無列於朝出入無詔於國惟興之日從新國之法

無列無詔則兄弟宗族或盡亡或雖存而失其祀矣興謂興起受命爲卿大夫得賜氏祀三世若孔子於魯兩

世爲下大夫不得云興故曰某殷人也猶用殷禮

君子已孤不更名

更古行反

更名或有所避忌父在則稟命爲之

已孤暴貴不爲父作諡

爲于僞反

貴謂爲卿大夫以上不爲父作諡者父不知己貴不敢以誣其親周不爲大王王季作諡

右第四章

居喪未葬讀喪禮既葬讀祭禮喪復常讀樂章

讀謂可讀之也既葬反虞以祭易翼故可讀祭禮樂章絃歌之詩

居喪不言樂祭事不言凶公庭不言婦女

言謂閒語及之祭事謂散齊以後凶死喪災眚婦女婚嫁及其疾病生育

右第五章

振書端書於君前有誅倒筴側龜於君前有誅

振拂塵端整齊其篇策也倒筴者筮人顛倒其蓍以齊之側龜卜人反側而省視之也不預整理至君前乃始爲之故皆有罰

龜筴几杖席蓋重素祗絺綌不入公門

重直龍反

龜筴非君卜筮時不得持入公門問私事席坐具君若

賜坐官爲設之几杖則亦君設賜之不得自以之入擅
尊安也蓋以蔽雨日雨霑服失容則不朝日則不敢蔽
也重素衣之緣以素者疑於凶服衫單衣不裼綌葛也
凡非所當入而以入公門者有司必呵止之不然交罰
之

苞屨扱衽厭冠不久公門

苞白表反
厭於涉反

苞管也扱衽者扱前衿於帶閒劬匍奔迫之容也厭冠
喪冠厭伏也喪冠外畢繇武下反出之故名厭冠此皆
初喪在殯之服飾舉三者則衰經可知蓋居喪者不從
政無入公門之禮小人無知而入則呵禁之

書方衰凶器不以告不入公門

衰七雷反

書方書贈物之板衰者謂以衰服入非謂服衰者也凶器棺槨明器之屬此謂喪在公門之內如宮正庶子所掌宿衛之類其成喪於次舍需用凶物必告於君而後敢以入也

公事不私議

議集眾講疑若今會議會推必於公庭不得因便在私署

右第六章

君子將營宮室宗廟爲先廡庫爲次居室爲後凡家造祭

器爲先犧賦爲次養器爲後

造在到反
養餘亮反

營度造也先者務盡其制後者取備而已廩庫者有家之本先於居室務實也家造大夫有家之所造也犧賦刃互盆簠之類養器以自奉養者盤杆卮匱之屬

無田祿者不設祭器有田祿者先爲祭服

無田祿謂下士與庶人在官者同祿頒粟而無田命士以上始有祿田及圭田也不設祭器者薦用養器無俎豆敦錡也財雖有餘不敢以貨殖所獲奉其先懼辱親也有田祿謂初受田祿先爲祭服而後祭器者祭器可假祭服須稱身也孟子曰器皿衣服不備不敢以祭無

器無服則薦而不祭以自艾也初得田祿則成衣服而假器以祭急於祭也古之人亟於欲仕仕而備物以祭乃得爲人子故人競於賢而朝廷之爵祿以重後世舉天祿天爵而僅以恣人之崇高靡厚則廉恥輕而名器不足爲榮矣況乎非所得之爵祿虧體辱親而藉口榮養以文其貪冒乎此古今之別也

君子雖貧不粥祭器雖寒不衣祭服爲宮室不斬於土木

弗余六反
衣於既反

邱墓壟也不忍其親之心雖死不奪而況於養其身與其妻子者乎不粥祭器則亦不買人之祭器以祀其先

不斬邱木則他人之邱木亦不忍伐之

大夫士去國祭器不踰竟大夫寓祭器於大夫士寓祭器

於士

竟與境同
居影反

故國者先人墓之所藏神之所依也雖不幸而去國固有反之心焉故祭器寄於人而不將之以去寄必於其等尊不下移卑不上干以明守也三世以後有興於新國者所寓者乃歸之

右第七章

大夫士去國踰竟爲壇位鄉國而哭素衣素裳素冠徹緣鞶履素箴乘髦馬不蚤鬻不祭食不說人以無罪婦人不

當御三月而復服

竟同境居影反壇墀字之誤裝演反鄉許亮反緣余絹反纖亦作幘莫惡反盪

與凡同側巧反說加字復芳服反

去國謂去其宗國也踰竟乃哭大夫待放於竟上未踰竟猶有反之望也壇當作墀除地曰墀素衣裳冠三年之喪大祥之服也徹緣鞬皆謂屨鞬無絢蓋非屨大功屨也髦馬不翦鬣箠車上覆笭素箠以白狗皮爲之喪車之飾也蚤修指爪鬚髮去鬢下衿毛如喪之不飾也不祭食喪食不祭也凡此雜用喪禮而不純爲君在嫌也說告語也或問其去國之故引咎歸己而諱國惡也當御大夫娶有二媵其御亦各有制也復服則所爲皆

復惟不說無罪則終始一耳古之人篤於故國而不忍忘君者如此夫君旣逐我於義已離而所適者亦中原冠帶之友邦可以得祿祀先而行其道然且哀之如喪考妣而引咎以讓善於舊君此豈故爲之文哉君子誠有其惻怛忠厚之心故發諸容貌言語有不如是而不安者況於君非棄我國羅傾亡一旦改而事讎而心不爲之動孔子曰女安則爲之言乎其無人之心也

右第八章 此上八章皆記士大夫之禮此下三章則雜諸侯以下之禮而記之

大夫士見於國君君若勞之則還辟再拜稽首君若迎拜

則還辟不敢荅拜

勞力報反還似
宣反辟吐義反

凡稱國君者皆鄰國之君見私見也此謂大夫以事出疆順見鄰國之君及出亡在外見其國君未委贄求仕也勞者慰問之還辟逡循卻避以非奉使不敢當勞也言若勞若迎拜者君加禮之非猶聘禮之必勞拜也迎拜謂未勞閒先拜也不荅拜君臣分殊不敢當賓主也大夫士相見雖貴賤不敵主人敬客則先拜客客敬主人則先拜主人

先拜者主人出迎客時望見而卽拜也敬者因事意所存而致敬也若賓主兩無致敬之事則士先拜大夫後

拜者還辟俟拜已而後荅拜

凡非弔喪非見國君無不荅拜者

弔喪助執事不自當賓禮見國君不敢亢賓主故不荅拜禮尙往來尊卑長幼俱必成賓主之禮無不荅拜矣
凡荅拜先拜者亦還辟之

大夫見於國君國君拜其辱士見於大夫大夫拜其辱同國始相見主人拜其辱

拜辱出門迎賓甫見而卽拜謝其辱臨也士見於大夫亦謂異國若同國則大夫士皆謂之主人

君於士不荅拜也非其臣則荅拜之大夫於其臣雖賤必

荅拜之

諸侯於大夫荅拜下天子也於士不荅拜殊大夫也非其臣雖士必荅不臣人之臣也大夫之臣雖賤荅拜非正君也賤謂下士

男女相荅拜也

男女有別不相爲尊卑雖舅於婦妻之母於壻無不荅拜者其荅拜也先拜者一拜荅者再拜先拜者又一拜謂之俠拜

右第九章

國君春田不圍澤大夫不掩羣士不取麋卵

澤有蘆葦禽獸所聚乳育處掩襲也羣牝牡合游成羣也麋鹿子卵雉孚乳其卵三者皆重傷生類故禁之凡田有徒眾則悉起之國君徒眾盛故可圍澤大夫之徒眾可掩羣士徒眾寡二者皆不能僅可取麋卵故因其得爲而禁之實則掩羣取麋卵亦諸侯大夫之通禁

歲凶年穀不登君膳不祭肺馬不食穀馳道不除祭事不

縣大夫不食梁士飲酒不樂

除遲據反
縣胡涓反

歲凶謂水旱登成也穀不登者螽螟風雹害穡事也祭肺殺牲有折俎則有祭肺天子日食少牢朔月太牢諸侯日食特牲朔月太牢則有之也馳道君門外大道除

發治之也縣天子宮縣諸侯軒縣祭不縣則燕食可知
梁加食也按公食大夫禮初設黍稷正饌已乃加稻粱
不樂謂不用鄉樂君子畏天災重民命恐懼修省而導
民以儉也

君無故玉不去身大夫無故不徹縣士無故不徹琴瑟
胡

反

大夫以下燕居則不佩玉君則常佩之以盡飾大夫有
特縣士張琴瑟而已故謂喪災病患君子以哀揜樂以
樂節憂使性情得其正而無偏戾雖有怫情隱慮尤必
廣其心以自裕也

右第十章

士有獻於國君他日君問之曰安取彼再拜稽首而后對稱國君者別於大夫君之辭他日謂士獻於君不親受致於君門使人受之他日見而後問之問猶勞謝也取用也安取彼猶言何用此也再拜稽首謝君之恤己貧而抑不終拒之也

大夫私行出疆必請反必有獻士私行出疆必請反必告私行謂親迎及弔葬於所親者士則或從師宦學獻者以所受贈賄奉君昭君之靈寵也獻必先告而後獻士告則無獻

君勞之則拜問其行拜而后對勞力報反

勞慰問其勞苦問其行者問其行道經歷所聞見也

右第十一章

國君去其國止之曰柰何去社稷也大夫句曰柰何去宗

廟也士句曰柰何去墳墓也

去違也大夫士謂去其宗國而出奔者國君則其臣諫止之大夫士則僚友畱之皆以大義相匡救

國君死社稷

國亡與亡也蓋國君之社稷受之天子承之先君先世以元德顯功受帝王之下而修其先祀國以外則皆非

其所有矣不能有其土則不能修其祀神明之胄浸且降爲編氓而祖功宗德自我絕矣是以有死而無去國君之義然也故記言國君死社稷而不言天子其義明矣李綱徇都人懷土之私情挾天子爲孤注一時浮競之士翕然賢之邪說相師脅四海九州之共主僅殉一都會之邑而天下淪胥邪說竊經義而不詳其爲害亦慚矣後之謀國者不幸而當其變其尙明辨於此哉

大夫死衆士死制

大夫出爲軍帥敗則死之士受君命專制一邑或制一軍邑亡軍敗則死之致身之義也大夫不死其采邑

右第十二章

君天下曰天子

天下無外之稱謂播告臣民及四夷子者男子之美稱
天者言其德位配天

朝諸侯分職授政任功曰予一人

朝直
遙反

分職分命六官之職授政頒政教於諸侯任功任邦國
都鄙以征役之功義取資眾以有爲故自稱曰予一人
踐阼臨祭祀內事曰孝王某外事曰嗣王某臨諸侯畛於
鬼神曰有天王某甫

阼阼階主祭者之位內事宗廟外事郊社柴望之類稱

孝者謂以致其孝養嗣者謂嗣續先人而奉祀典也臨諸侯者巡守臨蒞其國畛疆也入其疆而告祭之也鬼謂諸侯之祖禰神謂侯國之祀典其秩視諸侯故以臣主之禮臨之言有者不恆相告祝之辭某甫以字稱冠而字之達於天子

崩曰天王崩復曰天子復矣告喪曰天王登假措之廟立之主曰帝

復芳服反
假胡加反

崩史冊之辭復不名者土無二王魂神自喻也稱天子者死事質也登升也假與遐同遠也謂上升於天高遠不可挽也措之廟祔也主練主稱帝者夏殷之禮周則

稱王而加之諡通經所記多雜用三代之禮文記者蓋有損益折中之意焉

天子未除喪曰予小子生名之死亦名之

予小子者自稱也生名者有所播告既曰予小子下仍繫之以名示有適主也死名者無以諡故史策所書繫名王下春秋書王猛是已

右第十三章 自此章以下至於篇末皆記天子諸侯大夫士庶尊卑隆殺之節而先詳其名稱之別名者人治之大者也名生於實而實必因名以顯及其名之既定則令其之義詳要之職冠履之分皆依此而立則實

生名而名亦生實名實相待而不可偏廢者也人之所以異於禽獸者名而已矣心能喻之言不能別之則義不達而冥昧無有恆則故夫子言爲政而以正名爲先豈但爲衛輒言之哉申不害韓非之徒亦附此以立說顧流於纖刻而忠厚誠樸之意不足以存固君子之所不取然懲其已甚而槩以名爲刻覈淺薄之術則亦不足以及與於聖人經世之大用矣

天子建天官先六大曰大宰大宗大史大祝大士大卜典

司六典

大他蓋反司
息吏反下同

建天官者言本天治人使治天職也六大五官六府六

工皆殷制也典常也典司者爲其常職六典常法也大
宰司百官之典大宗司宗族之典大史司古今之典大
祝司祭祀之典大士司刑獄之典大卜司卜筮之典殷
尙鬼故祝卜尊焉

天子之五官曰司徒司馬司空司士司寇典司五眾
司徒司縣都鄉遂之眾司馬司六軍之眾司空司力役
之眾司士司宿衛之眾司寇司胥隸之眾

天子之六府曰司土司木司水司草司器司貨典司六職
府主藏者司土掌田稅司木掌山林司水掌川澤司草
掌原藪芻蕘司器掌百工貨泉也今謂之錢司貨掌口

率市征及鑄造

天子之六工曰土工金工石工木工獸工草工典制六材
土工陶金工冶石工治玉石木工梓匠輪輿獸工治革
骨草工作葦器制治也

五官致貢曰享五官之長曰伯是職方

長丁丈反下同

五官之長既各司其眾兼攝治五方之諸侯各司其方
司徒主中治畿外采男服司馬主南司空主北司土主
東司寇主西典其方之諸侯歲獻於天子之賦物謂之
貢貢之爲言功也諸侯之國莫非王土諸侯之財莫非
王所有所能致其獻者功力所獲而已伯猶長也

其擯於天子也曰天子之吏天子同姓謂之伯父異姓謂之伯舅自稱於諸侯曰天子之老於外曰公於其國曰君擯者導其方之諸侯以享於天子而擯者贊曰天子之吏某率某方侯某天子稱之父舅而尊以伯者以其長諸侯優之也自稱於諸侯稱於其所掌之方也於外者所掌之方侯國稱之其國縣內國邑

九州之長入天子之國曰牧

上五官之長以王官治侯國此九州之長則以其州之諸侯尊賢者爲之州各一長內外兼制之道也入天子之國謂率其州之諸侯覲天子而擯曰某州牧率某侯

某牧者率羣馴擾之意

天子同姓謂之叔父異姓謂之叔舅於外曰侯於其國曰君

叔者亞於伯之稱然此亦記其大凡耳按覲禮云非他伯父實來則不必五方之伯而後稱伯也且同姓自有昭穆假令在兄弟子孫之行爲伯爲長詎可稱之伯叔父乎此或據成王制禮時屬籍無卑幼者而言爾於外於其州所長之國也於國則其本封

其在東夷北狄西戎南蠻雖大曰子於內自稱曰不穀於外自稱曰王老

夷□也狄□也戎□也蠻□也四夷無□理故以□名
然此夷狄戎蠻亦在九州之境特以依山附海禮俗職
貢不同於諸侯遂狄而賤之若春秋之萊介潞甲及今
時黔蜀之士司然者大謂國土大而爲之長者也子爵
止於子也於內於其國於外於其所長之小國不穀謂
駑戾不能爲善稱王老者假王靈以威遠方

庶方小侯入天子之國曰某人於外曰子自稱曰孤

庶方猶言□□此蠻夷之君長受治於其長者也人者
略其君臣之辭於外於中國諸侯之前自稱稱於其國
也子賤辭孤者□□不知有父若無父之孤

天子當依而立諸侯北面而見天子曰覲天子當立而立

諸公東面諸侯西面曰朝

依於堂反
朝直遙反

依與展同其制如今屏風以絳爲質而畫斧焉建於其堂上室外戶西牖東當依當其前所謂負展也立者古者雖尊無坐見人之禮秦始制天子坐而受朝諸侯北面者五等諸侯皆北面也秋見曰覲受之於廟奉祖宗之靈以蒞之侯皆北面面王而奉教戒也門屏之間曰立在庫門之外外朝也公東面侯西面子男其北面與春見曰朝受摯於朝受享於廟出而與諸侯相見環列各於其位敘典禮也

諸侯未及期相見曰遇相見於郤地曰會諸侯使大夫問於諸侯曰聘約信曰誓涖牲曰盟

郤邱逆反約於笑反

期約也未及期謂卒然相遇不及期約也郤空閒也謂非國都會於郤地則遇亦於郤地也問者省候之意約結也信者不相疑貳誓矢於鬼神也涖牲者刑雞犬豕之血於坎取牛耳加盟言於上而埋之爲詛誓也此皆諸侯友邦往來之禮禮儀幣享各有差等古禮亡所考矣殷人始作會周人始作盟

諸侯見天子曰臣某侯某其與民言自稱曰寡人

此五等諸侯之通稱下四節放此先臣而後爵者爵固

天子之臣也漢以下先職而後臣非是

其在凶服曰適子孤臨祭祀內事曰孝子某侯某外事曰曾孫某侯某死曰薨復曰某甫復矣

適丁歷反復芳復反

適者正其爲先君之嗣所謂定位於初喪也不稱某者告臣民之辭不稱嗣侯未受王命也外事山川社稷曾之爲言重也曾孫者自古肇祀而已承之之意內外俱稱爵者昭世守也薨亦史冊之辭復稱字者諸侯爵非至極而臣子不敢斥其名也

既葬見天子曰類見

諸侯五月而葬嗣子三年喪畢乃以士服見天子既葬

見者謂天子巡守至其國不容不見也類似也執皮帛從其等之諸侯後似君非君似世子非世子也

言諡曰類

類力軌反

言請也類當作誅哀辭也不敢直言諡求哀誅也

諸侯使人使於諸侯使者自稱曰寡君之老

使於使者之使色吏反

諸侯之大夫不敢以爵稱依君以自見也此章皆記諸侯之禮此節承上文諸侯使人問於諸侯而附及之且以著寡君之稱也

右第十四章

天子穆穆諸侯皇皇大夫濟濟士蹵蹵庶人僬僬

濟子禮反僬子

笑反

此記相臨相見之容也穆穆深遠貌謂喜怒不形也皇
皇大也謂發氣充盈而盛大也濟濟齊肅貌踴踴趨事
若不及貌僬僬卑局貌上下各安其度則各安其心尊
者舒而思深卑者蹙而力勤也

右第十五章 此章記容之殊蓋名正而分定心安其
分而著於容也

天子之妃曰后諸侯曰夫人大夫曰孺人士曰婦人庶人
曰妻

妃配也君於陽曰帝君於陰曰后天稱上帝地稱后土

天子之妃爲天下母故與后土均稱夫扶也言扶助其君以奉宗廟社稷也孺屬也言以恩禮連屬其嫺黨也婦阜也阜安其家也妻齊也貧富勞逸與夫齊也

天子有后有夫人有世婦有嬪有妻有妾

此節舊誤在天子建天官之上

今正定於此

天子一后三夫人九嬪二十七世婦八十一御妻嬪誤序世婦下妻御妻妾賤執事者其數未聞

公侯有夫人有世婦有妻有妾

諸侯之妃秩視天子之夫人兩國之媵與夫人之媵爲世婦凡八人御妻蓋二十七人妾未詳

夫人自稱於天子曰老婦自稱於諸侯曰寡小君自稱於其君曰小童自世婦以下自稱曰婢子子於父母則自名也

稱於天子者獻享之辭老婦謂諸侯爲天子之老而已其婦也婦者降從士妻之稱稱於諸侯者鄰君來朝荅其享與致飧擯者之辭也小童無知之稱世婦以下無外交稱於其君爾子於父母自名者雖天子之后諸侯之夫人於其父母必自名不敢以貴臨之春秋傳曰吾季姜是已

右第十六章

列國之大夫入天子之國曰某士自稱曰陪臣某於外曰
子於其國曰寡君之老使者自稱曰某使色吏反

某士者以國繫士上蓋擯者之辭也諸侯之大夫雖貴
與天子下士齒爾於外曰子二句蓋錯誤當云於其國
曰子所使者稱之之辭若云某子使某是也下當云於
外曰寡君之老亦擯者之辭也使謂大夫之使不得
稱使臣以名自通而已

右第十七章

天子不言出諸侯不生名

謂列國史策所書也天子有天下不以畿內爲守雖避

亂出奔不言出也諸侯卒從其告訃而名之以正其終生則爵而不名君尊也

君子不親惡諸侯失地名滅同姓名

君子謂君國子民之道親惡猶言自作孽也失地亡其國也失國則絕其先祖之祀滅同姓則戕其本根盡失其君國子民之道而行同匹夫矣名列國之史名之

右第十八章

爲人臣之禮不顯諫三諫而不聽則逃之

不顯諫者不斥其過而暴之逃去也古之君臣分義雖明而恩禮相接大臣旣坐而論道小臣亦日侍於君而

與於從容諷諭之列可先事而進其微詞造膝而伸其
密論故不顯諫者可以弗顯諫而無事於激也後世尊
君抑臣分地懸遠士大夫之得進言於君也難而宦寺
戚畹與盤據密勿之大姦復從而閉之言路之臣非亢
言補牘申明於屬目之地亦孰從致之而孰與聽之哉
此古今臣道之所自別也而醜直惡正之徒猶借不顯
諫之說挑激人主而加言者以訐上沽名之罪則有賊
不見有讒不知而陷國於危亡可不察與

子之事親也三諫而不聽則號泣而隨之

號胡刀反

誠發於中不容自己也

君有疾飲藥臣先嘗之親有疾飲藥子先嘗之

愛君均於愛親

醫不三世不服其藥

閱歷多則知變記誦方書與師心自用者不敢以君親
嘗試之

右第十九章 自十三章以下記天子諸侯大夫等殺
名稱之別君臣之名正而分定矣至第十八章言君不
虛貴之道以見尊者之必有以尊此章則言忠臣資敬
事君之節以見臣之尊君不徒以其名而實必踐之記
者之意深矣此下則以補前章之未備而雜記之焉

疑人必於其倫

疑想像而名言之也倫等也此一章之大綱

問天子之年對曰聞之始服衣若干尺矣問國君之年長曰能從宗廟社稷之事矣幼曰未能從宗廟社稷之事也問大夫之子長曰能御矣幼曰未能御也問士之子長曰能典謁矣幼曰未能典謁也問庶人之子長曰能負薪矣幼曰未能負薪也

長丁
丈反

問天子諸侯問其使臣也大夫以下問其父兄也古者四十而仕爲士五十乃爵爲大夫故大夫士之年不待問惟問其子爾庶人謂未仕者天子曰聞之者至尊深

居雖見之不敢言見也至尊有所能否臣下不敢測量
但以衣之長短辨其長幼若干猶言幾許宗廟社稷之
事祀事也大夫有軍旅之任必習射御御卑於射謙辭
也典謁謂典司將命報人請謁也皆所謂擬於其倫也
問國君之富數地以對山澤之所出問大夫之富曰有宰
食力祭器衣服不假問士之富以車數對問庶人之富數
畜以對數地數畜之數所
矩反畜丑救反

地井疆山澤所出材木金錫魚鼈之屬先言以對後言
山澤者山澤或有或無也宰邑宰有采邑則有宰食力
食民賦稅若干也士三命賜車馬畜雞豚牛羊凡所對

者皆家國之本計君子財以給用不以貨賄爲寶此亦
儼於其倫之義

右第二十章

天子祭天地祭四方祭山川祭五祀歲徧諸侯方祀祭山
川祭五祀歲徧大夫祭五祀歲徧士祭其先

祭地社也四方四望也五祀春戶夏竈季夏中霤秋門
冬行也祭法謂天子七祀大夫三士二與此不同乃七
祀有司命泰厲說禮者引緯書以實之怪誕不經蓋漢
儒之所附會當以此及王制爲正方祀祀其方之望所
謂諸侯有方望也諸侯所祭之山川其境內名山大川

也祭其先者天子以下之所同士無外祀故專言之
凡祭有其廢之莫敢舉也有其舉之莫敢廢也

聖人居天子之位而當革命改制之時則酌乎情理以
爲廢興後此者雖或意有所見不敢損益之也

非其所祭而祭之名曰淫祀淫祀無福

爲淫祀者本以徼福而德所不及情所不通神固不歆
福豈可以徼而得哉

右第二十一章

天子以犧牛諸侯以肥牛大夫以索牛士以羊豕

犧當作
牲

反

牲牛毛色純者夏元殷白周騂肥牛不揀色而養於滌
者索求也謂求得而用之不養也牛兼羊豕爲太牢羊
豕無牛爲少牢大夫少牢而有牛者一則天子之大夫
視侯伯一則上大夫之虞祭用太牢也士特牲而兼羊
豕者亦上士虞祭

右第二十二章

支子不祭祭必告於宗子

自宗子以外皆謂之支子此宗子者統小宗言之祭必
告者謂宗子有故命支子攝祭若筮日筮尸之類一皆
請命

右第二十三章

凡祭宗廟之禮

此記牲粢玉幣之名而謂之禮者禮以敬爲主爲之嘉名殊於人用所以昭敬也宗廟之事親而崇質且爲之文則外祀可知已

牛曰一元大武豕曰剛鬣豚曰腍肥羊曰柔毛雞曰翰音犬曰羹獻雉曰疏趾兔曰明視

元大也首也武足跡牛頭角侈足迹大也鬣脊毛豚小豕早飼肥者翰羽也翰音者美羽翰而善鳴也羹獻者儀禮羹定羹飪鄭氏皆以爲用狗則狗爲羹具也雉以

爲羞兔以爲腊凡腊充陪鼎大夫用麋士用兔不言麋者闕文疏趾謂雉足趾長張則開疏也明視者兔目最明故方家以免矢療目疾

脯曰尹祭橐魚曰商祭鮮魚曰脰祭

尹正也脯爲饌主故曰正祭橐魚乾魚商量也謂酌量燥溼之宜也鮮魚用鮒鮒脰然條直也

水曰清滌酒曰清酌

水者盥洗之水若上尊之水則曰元酒洗滌也

黍曰薌合粱曰薌苳稷曰明粢稻曰嘉蔬

其居之反

五穀芬芳之氣曰薌合黏也黍於穀屬最黏者也其薌

也。謂之嘉蔬者，苗初生，蔥菁若可蔬茹也。

韭曰豐，本鹽曰鹹，𧄸

韭菹之爲豆實，鹽形鹽加籩也。豐本者，言其白莖豐長。大鹹曰𧄸。

玉曰嘉，玉幣曰量幣。

量制也，言長短合制，幣之制丈八尺。

右第二十四章

天子死曰崩，諸侯曰薨，大夫曰卒，士曰不祿，庶人曰死。

卽卒

反律

崩上墜也薨顛壞之聲卒終也不祿不終其祿也死則質言之崩薨卒史策之文不祿赴辭死恆言

在牀曰尸在棺曰柩

在牀襲斂遷尸之牀口陳也陳列形體示全歸也柩之爲言久也欲其藏尸久長也

羽鳥曰降四足曰漬

降落也鳥飛在上死則落也四足獸也漬謂以湯泡去毛

死寇曰兵

異於凡死者示當哀恤之

祭王父曰皇祖考王母曰皇祖妣父曰皇考母曰皇妣夫

曰皇辟

辟婢亦反

王大也大猶太也皇大也君也考成也令終而成乎歸也妣嬈也嬈美於考也辟君也夫爲妻主也妻有祭告者子幼無喪主妻攝爲主也

生曰父曰母曰妻死曰考曰妣曰嬈

前言夫此言妻互文見之嬈賓也言夫所賓敬也生稱質以全愛也死稱文以昭敬也以此推之生曰王父死曰祖必有辨矣祖入廟之稱也流俗不察生稱王父爲祖鄙哉

壽考曰卒短折曰不祿

此既畢喪而追語及之以崇高年而悼早夭大夫士同之

右第二十五章

天子視不上於袷不下於帶國君綏視大夫衡視士視五

步

上時掌反下戶嫁反綏與妥同湯果反

袷交領帶大帶上不過袷下不過帶謂垂目而視適見袷帶之間當膺際也綏視微垂其目之上瞼安然下視也衡平也謂目之上瞼適與睛平雖不下垂亦不及遠也視五步則揚目外矚矣此皆臨下之容尊者視愈斂

以謹瞻視養威望卑者視彌舒以便應接也

凡視上於面則敖下於帶則憂傾則姦

敖五到反

上於面謂揚目而自見其鼻屑下於帶首太俯也憂者近於有所憂思傾側目也姦者有所思而叵測

右第二十六章

君命大夫與士肆在官言官在府言府在庫言庫在朝言

朝

朝直遙反下同

肆習也謂講求國事之興革從違也命大夫與士肆者大夫聞國政而事有疑則使詢於士公議之也官署也若肆官職則於大宰之署肆田賦則於司徒之署也府

藏貨賄庫藏車器甲兵時命會同稽覈則就府庫肄之
朝則典禮之所從議也皆不得就私室謀公事季氏欲
用田賦使冉有訪於仲尼三發不對以其不延夫子於
官朝而訪之也

朝言不及犬馬

言不及褻

輟朝而顧不有異事必有異慮故輟朝而顧君子謂之固
輟罷也顧反顧固鄙陋也輟朝則禮成事畢恪共而退
無容反顧矣惟朝有變故則驚遽回望不然則有不軌
之心或抱恨而疾視今皆不爾而無故反視是鄙固而

不知禮也

在朝言禮問禮對以禮

稱引古禮相問荅

右第二十七章

大饗不問小

大饗祫禘也書曰茲予大饗於先王祫禘合祭羣廟莫適問其違從以時自盡其誠不卜也

不饒富

義未詳舊以爲備而已勿多於禮也

右第二十八章

凡摯天子鬯諸侯圭卿羔大夫鴈士雉庶人之摯匹摯與贊同

匹一作鷺
莫卜反

天子於天下無賓禮惟巡守所至告其鬼神則神爲主而已就見之則用鬯鬯者秬黍酒合鬱人所貢百草之英雜釀之則謂之鬱此言鬯者鬱鬯也圭命圭子男執璧言圭者統辭羔鴈皆以布維之天子之卿大夫則績其布雉不能生致用死者或用牯匹鴨也

童子委摯而退

凡賓奉摯入皆主人拜受惟見國君則委摯於地而退不授也童子於先生用臣禮不相授受尊師也其摯則

束脯

野外軍中無摯以纓拾矢可也

野外謂四時之田鄉遂之遠者卒相見軍中者異國之臣會師而遽相見也纓馬首尾飾以屬或斃爲之拾髣也射者以裏袞

婦人之摯棋榛脯脩棗栗

棋枳也榛似栗而小脯乾肉脩加薑桂捶治之諸侯之摯玉昭其所守也男子之摯禽田牧之所得也婦人之摯籩豆之實中饋之所勤也非其力之所致者貨財不足以爲禮童子不能田牧野外軍中倉卒不備物然必

有所執示不徒見也

右第二十九章

納女於天子曰備百姓於國君曰備酒漿於大夫曰備埽

灑

埽先到反
灑所賣反

納女致女也婿有故不親迎則女氏遣人致之此其將
命之辭備百姓言廣子姓令繁多也不必其爲嫡嗣謙
也天子之子孫必有封邑而賜氏

右第三十章

禮記章句卷二終